

La'ó Hamutuk

Institutu Timor-Leste ba Monitor no Analiza Dezenvolvimentu

Rua Felicidade, Gricenfor, Bairro Central, Dili, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



Submisaun husi La'ó Hamutuk

ba

Komisaun D Parlamentu Nasionál

Kona-ba

Proposta Lei Kódigu Propriedade Industriál

03 Juñu 2026

Konteúdu

Introdusaun	2
Konteúdu Kódigu Propriedade Industriál.....	2
Falta Rekursu Tékniku no Dependénsia ba Regulamentu iha Futura	3
Falta Mekanizmu Kontrolu no Indikasaun Jeográfiku	3
Prevene Monopóliu Estranjeiru ba Indústria Nasionál	4
Kultura no Koñesimentu Tradisionál Rekoñese nu'udár Patrimóniu.....	4
Balansu Protesaun no Interese Públiku	5
Konkluzau	6
Rekomendasaun sira:	6

Introdusaun

La'ó Hamutuk apresia ba inisiativa IX Governu hodi elabora no sujeita proposta lei Kódigu Propriedade Industriál ba iha diskusaun nivel Governu no Parlamentu Nasionál, maske daudauk ne'e Timor-Leste seidauk sai nasaun industrializadu hanesan temi barak iha artigu husi proposta lei ida, maibé ami fiar katak ida ne'e nu'udar estratéjia hodi dudu diversifikasaun ekonomia iha rai laran. Ami hein katak lei ida ne'e bele kontekstualiza ho ita nian realidade no reprezenta interese aspirasaun povu Timor-Leste nian la'ós de'it atu kumpre no kompleta kritéria ba ASEAN nian. Ami mós agradese ba Komisaun D Parlamentu Nasionál bele konvida La'ó Hamutuk atu oferese analiza kritiku ba proposta lei ida ne'e. Infelizmente, ezbosu proposta lei refere seidauk reprezenta ema hotu, tanba hahú husi elaborasaun, diskusaun to'ó iha finalizasaun proposta ida ne'e la konsege halibur hanoin no diskusaun kle'an husi entidade hotu inklui públiku, akadémiku, kooperativa, empreza lokál no parte relevante sira ne'ebé hola parte iha atividade no investimentu ba ekonomia rai-laran.

Ami nota mós katak dokumentu importante ida ne'e la públika iha pájina ofisiál Governu no Parlamentu Nasionál. Nune'e, ami nafatin enkoraja Governu atu promove di'ak liu tan sistema transparénsia liu husi públika informasaun importante sira liu-liu proposta lei ne'ebé relaciona ho asuntu públiku iha website ofisiál Governu no Parlamentu Nasionál. Ezijénsia ba publikasaun dokumentu sira esensíal tebes hodi atualiza no ajuda habiit koñesimentu husi parte interesada sira atu bele maximiza partisipasaun no bele ajuda Governu no Parlamentu hetan perspectiva oin-oin husi entidade hotu-hotu, partikulármente ba proposta lei Kódigu Propriedade Industriál ne'e rasik.

Tuir mai ne'e ami hakarak fahe ami nian analiza no interpretasaun balun ne'ebé reflète ba kontestu atuál nasaun nian, no mós rekomendasaun ba halo prevensaun ba risku injustisa no diskriminasaun bainhira implementa lei ne'e iha futuro. Ami espera katak, analiza sira ne'e bele apoiu Governu no distintu Deputadu/a sira iha Uma Fukun Parlamentu Nasionál hodi bainhira halo diskusaun antes foti desizaun final.

Konteúdu Kódigu Propriedade Industriál

Proposta lei Kódigu Propriedade Industriál ne'ebé elabora husi Governu bele hamosu possibilidade ba risku, ameasa no protesaun ba titular direitu ho mekanizmu sivíl, kriminál no administrativu. Iha nasaun ida ne'ebé sei dezenvolve hanesan Timór-Leste, la'ós de'it instrumentu jurídku, maibé reflexaun husi nia vizaun dezenvolvimentu nasional. Bainhira estadu ida hakerek kódigo kona-ba marka, patente no propriedade industriál seluk, presiza hatán pergunta fundamentál rua ne'e; se mak lei ida ne'e proteje? No ba sé mak nia serve?

Kódigo Propriedade Industriál ne'e regula direitu rua ne'ebé diferente mak marka, indikasaun jeográfiku, dezeńu industriál, patente, topografia produtu semicondutor, no segredu komersiál. Kódigo mós regula prosedimentu administrativu, infrasaun (sivíl, kriminál, kontraordenasau) no mekanizmu lisensa obrigatoria. Alende ne'e, proposta depende tebes ba regulamentu sira iha futuro, iha artigu barak no kria entidade autónoma ne'ebé seidauk iha estrutura, orsamentu, ka rekursu umanu klaru, ho prazu implementasaun tinan ida hafoin publikasaun, ne'ebé la realistíku tebes. Proposta mós falta mekanizmu ba koñesimentu tradisionál, la iha dispozisaun tranzitóriu ba direitu pre-esistente no la spesifika kustu rejistu ne'ebé asesivel ba emprezáriu ki'ik.

Proposta lei ne'e mós ko'alia kona-ba monopóliu no *patent blocking*, nune'e presiza liga direktamente ho Lei Konkorrénsia atu labele uza direitu patente no marka atu abuzu pozisaun dominante, taka merkadu ka impede produtór lokál. Iha asuntu hotu, kódigo ne'e hatudu estrutura lójiku, definisaun klaru no prosedimentu ne'ebé tuir padraun globál. Maibé, perspectiva ne'ebé kódigo ne'e adopta mak prioriza protesaun ba direitu privadu, monopóliu temporáriu liberdade merkadu no seidauk

konsidera impaktu ba povu ho konsumidór sira. Iklus liu, kódigu ne'e iha frakeza fundamentál, la konsidera ho sériu realidade nasaun dezenvolvimentu nian, kapasidade institusionál limitada, rekursu financeiru ki'ik, dependénsia ba teknolojia estranjeira no presiza urjente atu garante asesu ba saúde, ai-han no edukasaun. Tanba ne'e Lei Propriedade Industriál ida ne'e, presiza konsidera aspetu importante sira hodi garante justisa sosiál, inkluzau no dezenvolvimentu sustentável.

Falta Rekursu Tékniku no Dependénsia ba Regulamentu iha Futuru

Proposta Lei Kódigu Propriedade Industriál ne'e ambisiozu no harmoniza ho padraun internasionál hanesan The Agreement on Trade-Related Aspects of Intellectual Property Rights (TRIPS) no Paris Convention. Iha kontestu post adezaun TL ba ASEAN no Organizasaun Mundial Komérsiu, sistema ne'ebé diferente tebes, bele prejudika harmonizasaun no rekoñesimentu internasionál. Preokupasaun boot liu mak sistema patente ne'ebé depende ba tribunal competente atu realiza ezame matéria, la'ós entidade administrativa espesializada, ne'ebé kontradís ho prátika nasaun ASEAN sira, hanesan Singapura, Malázia, Tailândia no Vietnam ne'ebé iha sistema ezame matéria patente iha nia eskritóriu propriedade nasional.

Maske realidade Timor-Leste nian tribunál seidak iha kapasidade tékniku atu avalia patente, maibé La'ó Hamutuk konkorda atu asegura akontabilidade ba ezame matéria sira nee ho loloos no justu mak di'ak liu atu depende ba tribunal, duké loke oportunidade ba korrupsaun bainhira depende ba entidade administrativa espesializada ida, ne'ebé sei aumenta despeza estadu atu finansia entidade administrativa foun iha futuru. Importante atu asegura katak lei ida ne'e bele implementa efetivamente no proteje interesse nasaun sira ne'ebé seidak dezenvolve.

Ami mós rekoñese dezeñu industrial iha kódigu ne'e iha aspetu pozitivu balun, hanesan harmonizasaun ho padraun internasionál no período grasa tinan ida. Maibé, nia frakeza significativu mak definisaun la kobre dezeñu dijital (hanesan interface, modelu 3D, animasaun), número másimu 100 dezeñu iha pedidu ida ne'ebé komplikadu tebes ba dezeñadór ki'ik, ezame ne'ebé la verifica novidade, prazu opozisaun badak, no dependénsia boot ba regulamentasaun futuru ne'ebé seidak eziste.

Nune'e, presiza revizaun atu inklui dezeñu dijital, redús número másimu dezeñu ba 20–30, aumenta prazu opozisaun no kria via administrativa ba nulidade kazu simples. Dezeñu industrial importante ba setór kreativu Timor-Leste, maibé regras atuál la adapta ba realidade lokal no dijital, ida ne'e bele sai bareira ba dezeñadór ki'ik sira.

Falta Mekanizmu Kontrolu no Indikasaun Jeográfiku

Indikasaun jeográfiku iha kódigu ne'e importante tebes atu proteje produktu lokal ne'ebé iha ligasaun ho reputasaun, karakterístika no kualidade husi área produsaun nian. Maibé, kódigu atuais la fornese mekanizmu kontrolu ne'ebé klaru no la rekoñese ho di'ak lala'ok agrikultura subsisténsia no agrikultura familiar nu'udar matenek lokal. Timor-Leste iha produktu potenciál barak hanesan kafé, hare mean, hare metan, batar, tais, homan no produktu florestal sira ne'ebé bele sai identidade nasaun, maibé bainhira laiha sistema kontrolu no indikasaun jeográfika ne'ebé forte, produktu hirak ne'e la hetan protesau no promosaun di'ak. Nune'e, presiza kria mekanizmu inspesaun, sertifikasaun no rejistu ne'ebé asesivel ba produtór ki'ik, inklui kooperativa no governu lokal, atu bele proteje no promove produktu orijen husi Timor-Leste iha merkadu nasional no internasionál.

Inovadór lokal mak ema ka grupu ne'ebé moris iha Timor-Leste no kria invensaun foun. Sira ne'e mak peskadór, universidade, kooperativa ka ema individual ne'ebé iha ideia téknika ne'ebé foun. La'ós de'it kompañia boot, maibé mós ema ki'ik ne'ebé iha talentu atu inova. Maibé, kódigu atuál la fó

protesaun spesífiku ba sira, tanba sistema patente ne'ebé kompleksu no karu liu ba sira nia kapasidade. Lei tenke fornese taxa reduzida, assisténsia legal no informasaun iha Tetun atu ajuda inovadór ki'ik sira rejista sira-nia invensaun.

Bainhira inovadór lokál proteje, sira sente seguru atu investe iha peskiza, kria teknolojia foun, kontribui ba kriaun empregu no redús dependénsia ba teknolojia estranjeira. Ezemplu agrikultór husi Ermera ne'ebé kria variedade kafé foun, se la proteje, kompañia estranjeira bele patente nia invensaun iha rai seluk no bandu nia atu kuda nia fini rasik, ida ne'e injustisa no risku boot ne'ebé lei tenke prevene.

Lei propriedade tenke fó direitu eskluзивu temporáriu ba inovadór lokál atu uza, fa'an ka lisensa sira-nia invensaun. Maibé, protesau ne'e la bele sai obstákulu ba ema seluk atu kontinua inova. Tanba ne'e, lei tenke fornese taxa ki'ik ba inovadór ki'ik sira hanesan agrikultór, kooperativa, universidade pública no inventor individual, hodi asesu ba assisténsia legal atu ajuda sira prepara dokumentu patente no publika informasaun iha Tetun atu sira komprende sira-nia direitu no obrigasaun.

Agrikultór sira iha Timor-Leste depende ba fini ne'ebé sira rai no prátika ida ne'e eziste durante tempu bei'ala sira. Maibé, iha sistema patente rigorozu, kompañia boot bele patente variedade fini íbridu no depois bandu agrikultór atu prodús fini rasik, situasaun ida ne'e sei obriga agrikultór sira iha futuru atu sosa fali fini kada tinan. Kódigu atuál konkorda atu esklui variedade planta no animal husi patenteabilidade, maibé eskluzaun de'it la suficiente. Presiza kria sistema ne'ebé rejista variedade lokál, garante direitu agrikultór nian atu rai, uza, troka, no fa'an fini, ho prevene patente estranjeiru ba variedade ne'ebé comunidade kria ona durante tempu naruk. Hanesan ezemplu Índia ho sira-nia *Protection of Plant Varieties and Farmers' Rights Act*, Timor-Leste presiza lei hanesan atu garante seguransa ai-han, proteje diversidade jenétiku, no fortifika ekonomia rural.

Prevene Monopóliu Estranjeiru ba Indústria Nasionál

Lei justu tenke fornese mekanizmu protesau, estadu bele fó lisensa emergjénsia ba produtór jenérikus sem konsentimentu na'in patente, autoriza importaun medikamentu husi rai seluk ho presu baratu no prevene kompañia atu prolonga monopóliu liu husi patente sekundária ne'ebé laiha vantajen signifikante. Bainhira asesu ba medikamentu garante, mortalidade redús, produtividade aumenta no família sira la sai kiak tanba gastu osan barak ba tratamentu.

Kompañia estranjeira boot iha rekursu atu rejista patente barak iha Timor-Leste no sira bele uza patente ne'e atu blokeia indústria lokál prodús produktu similar, maski sira rasik la prodús iha TL – prátika ne'ebé hanaran "bloqueiu patente". Ne'e prejudika dezvoltamentu indústria nasional no kriaun empregu. Lei presiza introdús obrigasaun produsaun lokál, iha prazu tinan 3 depois patente, na'in patente tenke prodús iha Timor-Leste. Se la kumpre, patente bele kansela ka ema seluk bele prodús. Esperjénsia Brazil hatudu katak lisensa obrigatória bele uza kontra abuzu ka falta exploraun, tuir kondisaun legal.

Kultura no Koñesimentu Tradisionál Rekoñese nu'udar Patrimóniu

Koñesimentu tradisionál inklui variedade fini lokál, téknika agrikultura, ai-moruk tradisionál, téknika soru tais no koñesimentu ekolójiku kona ba floresta, bee no natureza. Maibé, sistema patente modernu la rekoñese koñesimentu tradisionál nu'udar invensaun tanba la tuir kritería formal. Liu tan, kompañia estranjeira bele kolleita koñesimentu tradisionál, patente iha sira-nia rai, no depois bandu comunidade lokál atu uza sira-nia koñesimentu rasik, prátika ida ne'e hanaran biopirataria. Kódigu presiza inklui koñesimentu tradisionál iha definisaun "estadu da téknika", kria rejistu nasional, ezije konsentimentu husi comunidade molok patente no garante fahe benefísiu bainhira sira-nia

koñesimentu uza ho komersiál. Hanesan Índia ho sira-nia *Traditional Knowledge Digital Library*, Timor-Leste bele kria sistema hanesan atu prevene biopirataria no hetan benefísiu ekonómiku.

Kódigu atuál la fornese protesauñ sufisiente ba ambiente. Lei presiza esklui patente abilidade ba invensaun ne'ebé prejudika ambiente, saúde, ka biodiversidade, ezije avaliasaun impaktu ambientál independente molok patente aplika no halo lisensa obrigatoria ba teknolojia ambientál hanesan bee moos no enerjia renovavel atu asesu ho baratu. Bainhira ambiente proteje, nasaun garante katak rekursu naturál bee, rai, floresta disponivel ba jersaun futuru, prevene risku saúde pública husi kontaminañsaun no fortifika resposta ba mudansa klimatika, inklui teknolojia ho impaktu ambientál presiza sujeita ba rejime ambientál no bioseguransa antes uzu komersiál. Hanesan ezemplu Brazil no Índia ne'ebé patente ba fini modifika jenétikamente tenke submete ba avaliasaun impaktu ambientál antes aprovasaun, se teknolojia ida prejudika poluisaun ka kontaminañsaun variedade lokál, patente bele la aprova.

Kódigu ne'e, tenke rekoñese no koloka didi'ak kona ba lala'ok agrikultura subsisténsia no agrikultura familiar nu'udar matenek lokál ne'ebé kontinua sei eziste hodi halo produsaun no kontinua prodús ai-han ne'ebé reziliente no kontinua uza fini orijen ne'ebé eziste nanis ona to'o ohin loron. Ezemplu produktu husi floresta; banin bee, akar, kumbili, tua sabu nsst, oinsá promove no dezenvolve. Produto potensial seluk mak TL nia hare mean, hare metan, hare makerek, mutin no seluk tan maibe tanba ita la hatene naran ita sempre dehan foos rai, ne'e nudar problem ba ita. Tuir mai mak koto, fore, batar, fore rai, tunis no produktu sira seluk ne'ebé komunidadade lokál kontinua uza hodi prodús ai-han ba sira nia konsumu no fa'an. Oinsá atu dezenvolve nudar riku soin ne'ebé TL iha no konsidera nu'udar propriedade indústriia atu proteje no promove nu'udar TL nia identidade hodi halo diferença ho produktu husi nasaun sira seluk. Ezemplu Kafe Timor koñesidu iha Mundu tanba ho naran íbridu orgániku de Timor (orgániku naturál) tenke valoriza produktu sira seluk atu hetan fatin nu'udar produktu orijen husi Timor.

Balansu Protesaun no Interese Públiku

Kódigu ne'e mós ko'alia kona-ba topografia produktu semikondutor, ne'ebé aliña ho padraun internasionál maibe reflète liu teknolojia rai boot, la konsidera realidade Timor-Leste ne'ebé teknolojia seidauk dezenvolve. Nune'e, di'ak liu atu foku ba protesauñ forte la'ós ba transferénsia teknolojia, ne'ebé bele impede nasaun ki'ik atu dezenvolve indústriia lokál liu husi enjeñaria reversa (reverse engineering) ba edukasaun no adaptasaun. Bainhira produktu protesauñ sira la rejistu, halo ema susar atu hatene topografia saida mak protejidu, nune'e bele ha mate inovasaun iha setór edukasaun no peskiza, tanba estudante sira bele asidentalmente viola topografia ne'ebé la rejistradu. Alende ne'e, presiza kria rejistu opsional, lisensa obrigatoria ba instituisaun ensinu no peskiza, inklui rekoñese esepasaun ba koñesimentu tradisionál no prátika komún hanesan tais no homan. Bainhira produktu semikondutor ne'ebé uza husi eskola, instituisaun saúde, no ONG sira, maibe sira la hatene katak produktu nee protejidu no sira para uza depois hatene katak komete violasaun, di'ak liu atu livre husi royalty, no permite Timor-Leste tenke uza flexibilidade LDC disponivel tuir TRIPS Artigu 66.1 no transferénsia teknolojia tuir Artigu 66.2.

Iha parte segredu komersiál, protesauñ ne'ebé iha bele abuzu husi korporasaun boot atu halo nonook sindikatu, asosiasaun konsumidór, ka ONG ambientál ne'ebé investiga katak kompañia sira komete prátika aat, hodi salva povu atu la uza produktu nee tanba sei afeta ba saúde pública ka ambiente. Maibe tanba klasifika informasaun hotu nu'udar segredu inklui dadus relevante, halo susar atu levanta ba oin. Presiza impoin obrigasaun ba titular atu justifika tanba sa mak segredu, autoridade pública bele avalia interese públiku, inklui protesauñ forte ba traballadór no sindikatu hodi divulga informasaun kona-ba seguransa traballu, saúde, ambiente, ka violasaun direitu traballu nian.

Iha balansu entre direitu propriedade ho interese públiku, asaun preventiva laho audiéncia bele sai abuzivu hodi hapara lutadór lejítimu ka krítiku ida, definisaun "boa fé" ne'e la klaru no bele prejudika produtór lokál sira ne'ebé la hatene katak sira nia direitu hetan violasaun, no tribunál sira tenke halo balansu entre protesau direitu propriedade nian ho protesau ba fornecedor ki'ik sira ne'ebé iha fiar. Kódigu ne'e kriminaliza de'it falsifikasaun iha nivel komersiál, maibé ignora falsifikasaun ne'ebé prejudika interese públiku, hanesan produktu médiku falsu maski iha eskala ki'ik. Destroi objetu aprende ne'e kontráriu ba sustentabilidade, dí'ak liu atu fó ba organizaun benefisiáriu sira depois hasai marka falsu. Nune'e, TL nu'udar nasaun ki'ik ne'ebé desenvolve tenke adopta modelu propriedade intelektuál ne'ebé inkluzivu, sustentável, no orientadu ba interese komún.

Konkluzau n

Proposta Lei Kódigu Propriedade Industriál ne'e ambisiozu no harmoniza ho padraun internasionál hanesan TRIPS no Konvensau Paris, maibé iha frakeza signifikativu ne'ebé bele prejudika nia implementasaun efetiva iha futuro. Timor-Leste nu'udar nasaun ki'ik ne'ebé seidak desenvolve tenke adopta modelu propriedade intelektuál ne'ebé inkluzivu, sustentável ne'ebé orientadu ba interese komún, la'ós kópia padraun rai boot no la konsidera realidade lokál. Lei ida ne'e tenke proteje inovadór lokál, garante direitu agrikultór atu rai fini lokál, asegura asesu ba medikamentu, aihan ho prevene monopóliu estrangeiru ba indústria nasionál, rekoñese kultura no koñesimentu tradisionál nu'udar patrimóniu ho labele prejudika ambiente no sustentabilidade.

Rekomendasaun sira:

- ✓ Kria rejistu nasionál ba patente ne'ebé válidu ona ho asesu públiku, atu permite ema hotu hatene patente saida mak iha forsa iha Timor-Leste no atu prevene violasaun asidentál. Inklui kria mekanizmu kontrolu no sertifikasaun ba indikasaun jeográfiku ne'ebé asesivel ba produtór ki'ik, cooperativa no governu lokál. Mekanizmu ida ne'e tenke inklui Inspesaun partisipativa ho envolvimentu comunidade.2. Fó protesau spesífiku ba produktu lokál sira hanesan, kafé, hare mean, hare metan, batar, tais, homan, tua sabu no produktu florestal seluk. Protesau ne'e tenke rekoñese matenek lokál nu'udar baze ba indikasaun jeográfiku. Estadu tenke kria inventáriu nasionál ba indikasaun jeográfica potensial iha kooperasaun ho comunidade, universidade no ONG lokál, atu identifika no promove produktu orijen husi Timor-Leste iha merkadu nasionál no internasionál.
- ✓ Adopta lei spesífika hanesan "Lei ba Protesau Variedade Planta no Direitu Agrikultór" tuir modelu Índia (*Protection of Plant Varieties and Farmers' Rights Act*), ne'ebé rekoñese agrikultór nu'udar inovadór no kustódia diversidade jenétiku. No asegura katak variedade aihoris/animál no prosesu biolójiku esensial sira la patenteável no konsagra agrikultór sira-nia direitu iha lei spesífiku sira.
- ✓ Halo revizaun atu inklui dezeñu dijital iha definisaun dezeñu industrial, inklui interfase utilizadór (user interface), modelu 3D, animasaun no dezeñu gráfiku dijital seluk. Redús número másimu dezeñu iha pedidu ida husi 100 ba 20-30 dezeñu, atu fasilita dezeñadór ki'ik no empreza mikro atu rejista sira-nia kriaun. Aumenta prazu opozisaun ba fulan 3 (tolu) hodi fó oportunidade ba parte interesada atu analiza no oponível dezeñu ne'ebé rejista.
- ✓ Introdús obligasaun produsaun lokál, iha prazu tinan 3 (tolu) depois patente hetan ona iha Timor-Leste, na'in patente tenke prodús produktu ne'e iha Timor-Leste ka hetan lisensa ba produtór lokál. Se la kumpre, patente bele prevee lisensa obrigatória ka medida koretiva, tuir TRIPS, bainhira iha abuza direitu, falta/insufisiéncia exploraun, emergéncia saúde ka

interesse públiku. Bandu blokeia patente (patent blocking) ne'ebé kompañia estranjeira rejista patente barak la ho intensaun atu prodús iha TL maibé atu blokeia indústría lokál.

- ✓ Realiza konsulta públika iha munisípiu (la'ós de'it iha Dili) ho envolvimentu agrikultór, cooperativa, dezeñadór, universidade, ONG, setór justisa no setór privadu lokál. Inklui fornese versaun iha Tetun ba comunidade ne'ebé la iha formasaun jurídika, atu sira komprende sira-nia direitu no obrigasaun.
- ✓ Atu asegura nia implementasaun, presiza investe iha kapasitasaun institusionál ba tribunál, ministériu no autoridade lokál molok kódigu implementa tomak, inklui treinamentu ba juis, prokuradór no funsionáriu administrasaun kona-ba propriedade industriál.

La'ó Hamutuk fiar katak rekomendasaun sira nee, bele ajuda Distintu Deputadu/a sira atu halo revizaun ho hadi'a proposta lei Kódigu Propriedade Industriál, hodi garantia katak lei nee representa interesse ema hotu nian, proteje ema ki'ik, promove inovasaun lokál no adapta tuir realidade Timor-Leste nian. Ami prontu atu diskute rekomendasaun sira ne'e liután, iha sesaun audiénsia ho Komisaun D Parlamentu Nasionál.

Obrigadu barak ba Ita-boot sira hotu nia atensaun no konsiderasaun tomak.

Ami be saran lia:



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia